

LA CARTA A LOS HEBREOS

YOOZ MAJCH PUNTU

¹ Tuqui timpuqui Yoozqui niž puntunaca zizkatchičha učhum tuquita atchi ejpnacžquiz. Yoozqui niž cuntiquiztan chiiñi profetanacžquiz jaknužquiztanami wiltan wiltan niž taku zizkatchičha. Nekztan nii profetanacaqui učhum tuquita atchi ejpnacžquiz parličičha.

² Anziqui tii timpuquiz Yoozqui niž Majch cjen učhumnacaquiz juc'ant zizkatchičha niž puntunaca. Yooz Majchta tjapa žejlñinacaqui. Yooz Ejpqui niž Majch cjen tjappacha paachičha. Nekztan niž Majch mantuquiz tjappacha utchičha.

³ Yooz Majchtan Yooz Ejpžtan tsjii kuzzizpančha, jalla nižtiquiztan Yooz Majchkazza Yooz Ejpž juc'ant zuma kuz tjeežñiqui. Nižaza Yooz Majch kjarquiz tii muntu žejlčha. Niiž chiitaž cjen tii muntu žejlñipančha. Walja azzizza niž chiitaqui. Nii Majchpacha učhum ujnacquiztan ticzičha, učhum pertunta cjisjapa. Jalla nekztan arajpacha ojkchičha. Jalla nicju arajpach Yooz Ejpž žew latuquiz julzičha, mantiñijapa.

⁴ Nii Yooz Majchqui tjapa anjilancžquiztan tsjan chawc jiliričha. Nižaza tjapa anjilanacžquiztan tsjan zuma puesto tanzičha. ⁵ Yooz Ejpqui ana jakzilta anjilžquizimi tuž chiichičha:

“Amčha wejt Majchqui. Jaziqui amquin wejt kamañal tjaa-učha”.

Jalla nuž cjican, ana jakzilta anjilžquizimi chiichiča. Antiz niž zinta Majchquiz alajakaz nuž chiichiča. Nižaza Yooz Ejpqui niž Majch puntuquiztan cjichizakazza:

“Wejrqui nižtajapa niž Ejp cjeeča. Niiqui wejtajapa wejt Majch cjequiča”.

⁶ Wiruñ Yooz Ejpqui niž zinta Majch tii muntuquiz cuchanžquiz pinsiscu tuž chiichiča: “Tjapa wejt anjilanacaqui wejt Majchquiz rispitle”.

⁷ Yoozqui anjilanacž puntuquiztan tuž chiichiča: “Wejrqui wejt anjilanaca cuchniñča tsjii apura ojkñi tjamižtakaz. Nižaza wejrqui wejtquiz sirwiñi anjilanacžquiz cjiskatuča tsjii uj peekstažtakaz”.

⁸ Pero niž Majch puntuquiztan Yooz Ejpqui tuž cjichiča:

“Amča Yoozqui. Am mantiz puestuqui wiñayjapa cjequiča. Am mantizqui lijitumapankazza. ⁹ Amqui zuma lijituma mantiz pecñampanča. Yooz kuz quintra paañinaca panž chjaawjñamča amqui. Wejrtča am Yoozqui. Amquiz juc'ant honorchiz cjiskatchinča, čjul žejlñinacžquiztanami”.

¹⁰ Yooz Ejpqui niž Majch puntuquiztan cjichizakazza:

“Amqui Jilirimča, tuqui timpuquiztanpacha amqui anaž čjulquiztanami tii mundo paachamča. Nižaza am kjaržtan arajpacha paachamča. ¹¹ Amqui wiñayjapam želaquiča. Pero nii paata arajpachami yokami tucuzinžnaquiča.

Tsjel zquitižtakaz tucuzinzaquiča. ¹² Piižta zquitižtakaz tsjii latu ectaž cjequiča. Liwj campiitaž cjequiča. Amzti ana nižta campiyaquiča. Amqui wiñay wiñayjapa cjequiča”.

¹³ Yoozqui niž Majchquiz tuž cjichizakazza: “Wejt žew latuquiz julzna, am quintranaca kjojchtan tjezcama”.

Jalla nuž Yooz Ejpqui cjichiča niž Majchquiz. Ana wira tsjii anjilžquiz nuž chiichiča. ¹⁴ Tjapa anjilanacača ana cheraña ojklayñiqui, Yooztajapakaz sirwiñiča. Yoozqui ninaca cuchanča, liwriita žoñinacžquiz yanapi.

2

LIWRIIÑI TAKU IMPORTIČHA

¹ Jilanaca, cullaquinaca, Yooz puntu tjaajintanacžquiz juc'anti kuz tjaaz waquiziča, werar zuma kamañquiztan tsjii kjutñi ana chjitzta cjisjapa. ² Tuquiqui anjilanacaqui žoñinacžquiz chiichiča. Jalla nii chiitaqui walñitača. Jakziltat nii chiita jaru ana kamtčhaja, uj paachiča. Nekztan nii uj paañinacaqui ninacž ana zuma paatiquiztan jama castictapan cjissiča. ³ Nižaza tii timpuquiziqui zuma liwriiñi takuqui učumnacaquiz zumpacha kjanzt'itača. Jalla nii liwriiñi taku ana catokaquiž niiqui, ¿kjaž Yooz castictiquiztan atipasajo? Anapanž nii castictiquiztan atipi atasača. Primeraqui nii liwriiñi takuqui Jesucristo Jiliriž paljaytatača. Nekztanaqui Jesucristuž tjaajinta žoñinacaqui nii liwriiñi takupacha učumnacaquiz lijituma paljaychiča. ⁴ Jalla nuž paljayan Yoozqui zuma

pajk obranacami nižaza isphantichucanacami, nižaza tjapaman milajrunacami paachiča. Nižaza Yoozqui criichi zoñinaczquiz niž munañpacama niž Espíritu Santuž tjaata kamañanaca tojunchiča. Jalla nižta Yoozqui tjeeziča, nii liwriiñi takumi lijitumača, jalla nii.

JESUCRISTUQUI ZOÑI CJISSICHA

⁵ Yoozqui niž wiñajjapa mantiz puestuquiz anjilanaca ana utchiča. Jalla nii puntuquiztan cji-ržcuča. ⁶ Tsjii cjiirta Yooz takuqui tuž cjiča:

“Zoñiča anaž čhjulumi. Yooz Ejp, ¿kjažtiquiztan amqui zoñinaca cjuñjo? ¿Kjažtiquiztan zoñinaczquiz honorchiz cjiskatjo? ⁷ Tii kjaž watanaca anjilanacaqui zoñžquiztan tsjan jilir puestuquiz žejlča. Jalla nuž Yoozqui munchiča. Nekztanaqui Yoozqui zoñžquiz juc'ant honorchiz cjiskataquiča anjilanaczquiztan. Nižaza juc'ant zuma kamzqui zoñžquiz tjaataž cjequiča. ⁸ Yoozqui zoñž mantuquiz tjapa tii muntupacha utča”.

Jalla nuž chiichiča Yooz takuqui. Jaziqui Yoozqui zoñž mantuquiz tjapa tii muntu žejlñinaca utchiča. Jalla nižtiquiztan zoñž mantuquiz tjappachapankaz cjequiča. Imazipanča tjappacha zoñž mantuquiz žejlča. ⁹ Pero Jesucristuž puntu naya. Niiqui tsjii kjažtapacha anjilanaczquiztan upa jilir puestuquiz cjiskattatača, zoñinacz laycu ticzjapa. Yooz zoñinaczquiz okzñiž cjen Jesucristuqui tjapa zoñinacz laycu ticziča. Jalla nuž ticztiquiztan Yoozqui nižquiz juc'ant zuma honora tjaachiča;

nižaza Jesucristuqui juc'ant zuma kamaña tanzicha.

¹⁰ Yooz cjen tjappacha žejlča, nižaza nižtajapa žejlča. Zuma Yoozqui pinsichiča, tjapa niž maatinacaqui pruebanaca watžcu, nižtan chica honorchiz cjequiča. Jalla nii pinsichiča. Jalla nižtiquiztan Yooz Ejpqui pinsichizakazza, Jesucristuqui sufrisnaca watžcu, ancha zuma Liwriiñi cjisnaquiča, jalla nii. Jesucristupankazza žoñinaca Liwriiñiqui. Jalla nii liwriiñi pinsitaqui ancha zumača. ¹¹ Jaziqui Jesucristuqui žoñinaczquiz Yooz irata zuma kamañchiz cjiskatasacha. Nii zuma kamanchiz cjiskatñimi, nižaza nii zuma kamañchiz cjiskattanacami tsjii Yooz Ejpchizkazza. Jalla nižtiquiztan Yooz Majchqui liwriita žoñinaczquiz “Wejt jilanaca” cjican chiizjapa anaž aza. ¹² Yooz tawk liwruquiz Jesucristuqui tuž cjiča:

“Wejrqui wejt jilanaczquiz Yooz puntu chiižinača. Yooz partir žoñinacztan žejlcan Yoozquin honora tjaacha”.

¹³ Cristuqui zakaz cjiča:

“Wejrtča Yoozquinkaz kuzziztqui”.

Wilta zakaz cjiča:

“Yoozqui wejtquiz žoñinaca tjaachiča, maatinacažtakaz. Yooz Tata, tekz žejlča ninacami wejrmi”.

¹⁴ Jesucristuž liwriita žoñinacaqui curpuchizza, nižaza ljocchizza. Jalla nižtiquiztan Jesucristuqui curpuchiz nižaza ljocchiz zakaz cjissiča. Jalla nižta curpuchiz cjiscu, ticziča ana wal diablu tjatanzjapa. Nii diabluqui konz poderchizza. Pero ticžtiquiztan Jesucristuqui

diabluž poder atipchiča. ¹⁵ Zoñinacaqui ticz ekskcu diabluž mantuquizpan žejlča. Nii zoñinaca liwriizjapa, Jesucristuqui ticziča. ¹⁶ Jesucristuqui tii muntuquiz tjonchiča, ana anjilanacžquiz yanapzjapa antiz Abrahamž majchmaatinacžquiz yanapzjapa. Jakziltat Jesucristužquin kuz tjaačhaja jalla ninacaqui Abrahamž majchmaatinacažtakazza. ¹⁷ Zoñinaca liwriiñi cjisjapa, Jesucristuqui zoñinaca iratpacha cjistanča. Jalla nuž zoñinaca irata cjican, Jesucristuqui zoñinacžtajapa zuma lijitum palt'iziñi cjissiča Yooz yujcquiziqui. Okzñi kuzzizza učum palt'iziñiqui. Zoñinacžtajapa palt'iziñi cjican Jesucristuqui Yoozta zuma wilanažtakaz ticziča. Jalla nižta ticziča, ujchiz zoñinacž laycu. ¹⁸ Jesucristupacha sufrichiča, nižaza diabluqui Jesucristo yanziča ujquiz tjojtskatzjapa. Pero sufrisquiztanami diabluž yanžtanami atipchiča. Jalla nuž tjapa atipžcu Jesucristuqui zoñinacžquiz yanapi atasacha, ana ujquiz tjojtzkatzjapa.

3

JESUCRISTUQUI MOISESQUIZTAN TSJAN JILIRIČHA

¹ Yooz kamañchiz jilanaca, cullaquinaca, Yoozqui ančhucaquiz kjawziča Jesucristužquin kuzziz cjisjapa. Jalla nižtiquiztan arajpach wajtchiz mazinaca cjissinčhucča. Ančhucqui Jesucristuž kuz zumpacha naya. Jalla niiqui učumnacalta tsjan jilir apóstol cuntača, Yooz puntu zuma tjaajinchiž cjen. Nižaza

uĉumnacalta timpluquiz langzñi pajk jiliri cuntaĉha, uĉumnacatan Yooztan zuma cjiskatchiž cjen. ² Tuquiqui Yoozqui Moisés utchiĉha tsjii puestuquiz. Moisesqui nii puesto zuma cumplichiĉha, Yooz kjuychiz žoñinacžquiz sirwican. Jalla nižta irata Yoozqui Jesucristo tsjii puestuquiz utchiĉha. Jesucristo zakaz nii puesto zumapan cumplichiĉha Yooz kjuychiz žoñinacžtajapa. ³ Tsjii kjuy kjuyñi zoñiqui nii kjuyquiztan tsjan honorchizza. Jalla nižta irata Jesucristuqui Moisesquiztan tsjan honorchizza. Jalla nuž waquizichiĉha. ⁴ Zapa kjuyaqui tsjii žoñiž kjuytaĉha. Pero Yoozza tjappacha paataqui. ⁵ Yooztajapa sirwiñi Moisesqui niž puestuquiz zuma cumpliñi kamchiĉha, tjapa Yooz kjuychiz žoñinaca irpican. Moisesqui Yooz puntunaca tjaajinchiĉha. Jalla nižta tjaajincan Moisequi Yoozquin sirwichiĉha. Wiruñaquí nii Yooz puntunacaqui tsjan kjana tjaajintataĉha. ⁶ Jesucristuzti anaĉha Yoozquin sirwiñikazza. Antiz Yooz Majchpanĉha. Jalla niiqui niž puestuquiz zuma cumpliñi kamchizakazza, Yooz kjuychiz žoñinacžquiz mantican, tsjii jilir maatižtakaz. Nižaza uĉumnacaĉha Yooz kjuychiz žoñinacaqui. Jakziltat tirapan Yoozquin tjurt'ichi kuzzizlaja, jalla niĉha ultimu Yooz kjuychiz žoñiqui. Jesucristuqui taku tjaachiĉha, Yooz žoñinacaqui arajpachquin nižtan chica kamaquiĉha, jalla nii. Jaziqui jakziltat Jesucristuž tjaata takuž cjen chipchi kuzzizlaja, jalla niĉha ultimpacha Yooz kjuychiz žoñiqui.

ANA CHOJRU KUZIZ CJEE

⁷ Jalla nii puntuquiztan Yooz Espíritu Santuqui Yooz tawk liwruquiz tuž cjicha:

“Anztan Yooz kjawžta nonžcu, ⁸ anaž chojru kuzziz cjee. Ančhuca tuquita atchi ejpnacaqui ch'ekti yokquin žejlcan, chojru kuztan Yooz quintra cjissiča. Chojru kuztan persun kuzcamakaz kamz pecchiča, Yooz žawjwa zijjquinzjapa. ⁹ Pusi tunc watanaca ninacaqui Yooz pajk obranaca cherchiča. Jalla nuž cheržcumi, tirapan Yooz žawjwa zijjquinz pecchiča. Anapan criyatča. ¹⁰ Jalla nižtiquiztan nii žoñinacž quintra žawjiča Yoozqui. Ninacž puntuquiztan Yoozqui tuž cjichiča: ‘Ninacž kuzqui tsjii kjutñipan pinsiča. Wejt zuma kamaña ana pajz pecča’. Nuž cjichiča Yooz Ejpqui. ¹¹ Jalla nižtiquiztan Yoozqui ninacž quintra žawjžcu, tsjii juramentužtan chiižinchiča, tuž cjican: ‘Anapan wejt famillquiz luzkatača, wejtan chica jeejzjapa’ ”.

¹² Jilanaca, cullaquinaca, persun kuzquiz cuitasa, Yoozquin ana criichi kuzziz ana cjisjapa. Anawal kuzziz cjequiž niiqui, ultim žejtñi Yoozquiztan zarakzkatta cjequiča. ¹³ Tii timpuquizkaz Yoozqui žoñinaca kjawznaquiča, jaziqi zapurupan porapat p'ekinchayasaquiča, Yoozquin nonznajo. Anapanž ančhucqui persun uj paažcu incallskataquiča, Yooz quintra paazjapa. Jalla nižta anawali paažcu chojru kuzziz cjisnasača ančhucqui. Nekztan Yooz kjawžta ana nonžni atasacha. Ančhucqui jalla nižta anazum kuzziz ana cjisjapa, porapat

p'ekinchayasaquiča. ¹⁴ Tuquiqui učumqui Jesucristužquin kuz tjaachinčumča. Jakziltat tirapan ticzcama Jesucristužquin tjurt'ichi kuzziz kamčhaja, jalla niiqui ultimu Cristužtan tsjii kuzzizza.

¹⁵ “Tonjpacha tii Yooz taku nonžna: Anztan Yooz kjawžta nonžcu, anaž chojru kuztan Yooz quintra cjee. Jaknužt ančuca tuqita atchi ejpnaca chojru kuztan Yooz quintra želatčhaja, anaž nižta cjee”.

¹⁶ Egipto yokquiztan Moisés irpita žoñinacaqui, jalla ninacatača Yooz quintranacaqui. Yooz taku nonžcupacha ninacatača chojru kuzzizpan. ¹⁷ Nekztan Yoozqui pusi tunc wata ninacžtajapa žawjchiča. Ninacaž uj paatiquiztan žawjchiča. Nekztan ninacaqui ch'ekti yokquin walja ticziča. ¹⁸ Nižaza Yoozqui tsjii juramentužtan chiižinchiča, “Anapan wejt famillquiz luzkatača ančucqui wejttan chica jeejzjapa”, cjican. Jalla ninacača Yooz taku ana cazñinacaqui.

¹⁹ Jalla ninacaqui ana criichiž cjen, Yooz wajtquin ana luzi atchiča. Jalla nii kjanapacha intintita cjesača.

4

YOOZ FAMILLQUIZ LUZA, NIIZTAN JEEJZJAPA

¹ Tuquiqui Yooz Ejpqui taku ecchiča tuž cjican, “Jakziltat weriž kjawžta nonžaj niiqui, wejttan chica jeejznaquiča, nižaza liwriita cjesača”. Nii Yooz ecta takuqui tirapan walča. Jaziqui učumqui persun kuz cuitila. Persun kuz ana cuitaquiž niiqui, ana Yooztan chica jeejnačhani.

² Učumnacaquizimi tuqita ejpžquizimi

nii zuma liwriiñi Yooz taku paljaytatacha. Pero ninacaqui inakaz nonziicha, ana criichiž cjen. ³ Učhumqui nii liwriiñi taku catokžcu criichinčhumcha. Jalla nižtiquiztan liwriitaž cjen Yooztan chica jeejža. Pero ninacž puntuquiztan Yoozqui cjichiča:

“Ninacž quintra žajwžcu, wejrqui tsjii juramentužtan chiichinča, tuž cjican: ‘Ninacaqui wejttan chica ana jeejnaquiča, anapan wejt famillquiz luzkatača’ ”.

Yoozqui tii muntu paažcu, nii langz žerziča; sojta tjuñinacakaz langziča. ⁴ Pakallak tjuñ puntuquiztan tsjii Yooz takuqui tuž cjiča:

“Pakallak tjuñquiziqui Yoozqui tjapa niiž muntu paaz langzquiztan jeejiča”.

⁵ Tsjii zakaz Yooz takuqui cjiča:

“Nii uj paañi žoñinacaqui anapan wejttan chica jeejznasača, wejt famillquiz cjisjapa”.

⁶ Nii tuqita ejpnacaqui liwriiñi taku nonžcu ana Yooz famillquiz cjissiča, Yooz tawk jaru ana kamchiž cjen. Jalla nižtiquiztan anziqiu iya žoñinacaqui Yooz famillquiz cjesača. ⁷ Yoozqui anzta timpuqui sitchiča, žoñinaca wilita kjawzjapa. Ažk watanaca nii tuqita ejpnacžquiz chiižcu Yoozqui Davidžquiz chiikatchiča, tuž cjican:

“Anzta žoñinacami, nižaza jazta žoñinacami, Yooz taku nonžcu, ana chojru kuzziz cjee”.

Jalla nii Yooz takuqui tuquitianpacha chiižintača.

⁸ Josuequi žoñinacžquiz ultimu jeejskattasaž niiqui, Yoozqui ana chiitasača, iya timpu želaquiča žoñinacž Yooz famillquiz jeejzjapa.

⁹ Jalla nižtiquiztan anzta timpuquizzakaz

Yoozquin kuzziz žoñinacaqui Yooz famillquiz luzasača, Yooztan jeejzjapa. ¹⁰ Jakziltat Yooz famillquiz luzzaja, jalla niiqui ch'aman kamznacquiztan jeejža, jaknužt Yoozqui niž mundo paaz langztiquiztan jeejztčhaja, jalla nižta. ¹¹ Jalla nižtiquiztan učhumnacaqui Yoozquin tjapa kuz tjaz waquiziča, Yooztan jeejzjapa, nižaza Yooz famillquiz kamzjapa. Učhum tuquita atchi ejpnacaqui ana criichiž cjen ana Yooz famillquiz luzziča, antiz castictatača. Jalla ana nižta casticta cjisjapa, učhumqui criizpanž waquiziča.

¹² Yooz takuqui žejtñi Yooz azzizza, žoñinacž kuzquiz zuma, ana zuma, jalla nii tjeezjapa, nižaza cjuñskatzjapa. Nižaza nii Yooz takuqui tsjii porap latu archiz cuchilluztakazza. Pero tsjan ariča. Yooz takuča žoñž animquizimi kuzquizimi uj cjuñskatñiqui. Tsjii žoñž kuzqui parti žoñinacžquiztan chjojta cjesaž niimi, jalla nii kuzquiz Yooz takuqui uj cjuñskatasacha. Nižaza Yooz takuqui žoñž kuzquiz pinsitanacami tantiitanacami kjanapacha tjeeža, zuma ana zuma, jalla nii. ¹³ Yoozqui tjappacha paachiča. Jalla nižtiquiztan anaž jakziltami nižquiztan chjojžni atasacha. Ultim pjalz tjuñquiziqui tjappacha persun kamañ puntuquiztan, nižaza kjažtat kamtčhaja, jalla nii puntunacquiztan cuenta tjaastanča. Tjapa žoñinacž kamta puntunacquiztan Yoozqui liwj zizza, nižquiztan ana tsjii takumi chjojžni atasacha.

JESUCRISTUCHA UCHUM PALT'IZIÑIQUI

14 Jesucristuĉha Yooz Maatiqui. Jalla niiĉha uĉum chawjc timplu jiliri cuntaĉha. Niżaza niiqui arajpachquin Yooz yujcquin luzziĉha, uĉumnacaltajapa tsjii wali palt'iziĉni cjisjapa. Jalla niżtiquiztan uĉumqui Jesucristużquin kuzziz kamcan jalla nii kamzquiz tjurt'ichi kuzziz cjila. 15 Uĉumqui Yooz irata zuma kamzjapa panż pjaltiĉha. Pero Cristuqui zuma okzĉni kuztan uĉum criichinacżquiz cjuĉĉha, niżaza yanapasaĉha. Uĉum irata Jesucristuqui pruebanaca watchiĉha. Ana uj paacan tjapaman pruebanaca watchiĉha. Jalla niżtiquiztan, Jesucristuqui zuma okzĉni kuztan uĉumnacaltajapa palt'izinasacĉha. 16 Jalla niżtiquiztan ĉhjul pruebanaca watanami uĉumnacaqui okzĉni Jesucristużquin tjapa kuztan cjee. Yooz yujcquin macjatz ana jiwjataquiĉha, uĉum ujnaca pertuna mayizizjapa, niżaza pruebanaca želan, Yoozquiztan mayizaquiĉha nii pruebanaca zuma watzjapa.

5

1 Tjapa timplu jilirinacaqui žoĉnacżquiztan illztataĉha, žoĉnacżtajapa Yoozquin palt'izinajo. Niżaza nii timplu jilirinacaqui žoĉnacż wilananacami Yooz yujcquiz timplu altarquiz nonzĉnitaĉha, žoĉnacż ujnaca pertunta cjisjapa. Niżaza žoĉnacżtajapa ninacż ofrendanaca Yooz yujcquiz tjeezĉnitaĉha. 2 Timplu jilirinacapacha pruebanaca sufriĉha, parti žoĉnaca irata. Niżaza uj paaĉha parti žoĉnaca irata. Jalla niżtiquiztan nii jilirinacaqui pasinziz kuzziz cjesaĉha ana

zizñi žoñinacžtajapami, nižaza tsjii kjutñi cjcjiñi žoñinacžtajapami. ³ Ujchiz zakaz cjicanaqui nii timplu jilirinacami persun ujnacquiztanami nižaza parti žoñinacž ujnacquiztanami Yoozquin wilana tjaastanča, pertunta cjisjapa.

⁴ Nižaza anaž jakziltami timplu jilirž puestuquiz persun kuzcama luzasača. Yoozqui žoñinaca kjawža, nii puestuquiz utzjapa. Jaknužt Yoozqui Aarón cjita žoñi utčhaja, jalla nižta.

⁵ Nižaza Cristuqui anaž persun kuzcama palt'iziñi puestuquiz luzziqui. Yoozpankazza nii honorchiz puestuquiz utchiqui. Nižaza Yoozqui Cristuž puntuquiztan tuž cjichiča:

“Amča wejt persun maatumqui. Amquiz wejt kamañal tjaa-uča”.

⁶ Cristuž puntuquiztan Yoozqui zakaz cjiča:

“Amča žoñinacžtajapa palt'iziñi jiliriQUI wiñay wiñayajapa. Jaknužt Melquisedec cjitaqui zuma palt'iziñi jiliri uchtatažlaja, jalla nižta”.

⁷ Tii muntuquiz kamcan Jesucristuqui Yooz Ejpžtan parličiča, nižaza Yooz Ejpžquin rocčiča, tjurt'iñi kuzzizpan kami yanapzjapa. Altu tawkžtan chiican nižaza kaacan Yoozquin jalla nuž mayizichiča. Yoozqui Jesucristo liwrii atatča, ana cruzquiz ticzjapa. Pero Jesucristuž ticzquiztan ana liwriitaž cjenami Yooz Ejpqui niižquiz yanapčiča, Yooz kuzcamapankaz kamzjapa. Jesucristuqui Yooz Ejpžquin kuzziz cjen yanaptatača.

⁸ Cristuqui Yooz Majch cjenami sufrichiča. Jalla nižta tii muntuquiz sufrichiž cjen Yooz Ejpž kuzcamapankaz kamčiča. ⁹ Jalla nuž

tii muntuquiz sufrichiž cjenami, jalla niičha Yooz kuzcamapankaz kamñiqui. Jalla nižtiquiztan zoñinaca liwriiñiqui cjissiča. Jakziltanacat nižquiz cazzaja, jalla tjapa ninacaqui wiñayjapa liwriitaž cjequiča. ¹⁰ Yooz Ejpqui Cristo utchicha zoñinacžtajapa liwriiñi nižaza palt'iziñi cjisjapa. Jaknužt Melquisedec cjita zoñiqui palt'iziñi jiliri uchtatažlaja, jalla nižtapacha.

PERSUN KUZ CUITASAQUICHA

¹¹ Jalla nii puntuquiztan waljaž takunacaž žejlča. Pero ch'amača ančucaquiz intintiskatzqui. ¹² Ažk watanaca ančucqui criichinčucča. Jaziqui Yooz puntu tjaajiñi maestrunaca cjichuca cjiwča. Pero wiltakaz ančucqui tjaajinta cjis pecča Yooz tawk pjasilanaca zizjapa. Ančucqui wawanacažtakaz lichikaz pecča Yooz tawk čheri lujlquiztanaqui. ¹³ Lichtan mantinasñi wawažtakazza ančucqui. Jaziqui lijitum Yooz kamaña ana zuma kamiñčucča. ¹⁴ Čheri lujlqui pajk zoñinacžtača. Jalla nižta irata ch'aman intintazuc puntunaca zuma criichi zoñinacžtajapača. Jalla ninacaqui zuma kamchiž cjen zumpacha tantiyasača kamañ puntunaca, zuma, anazuma, jalla nii.

6

¹ Pjasil Yooz puntunacquiztan zizñi, cjee. Jesucristuž puntuquiztan tjaajintanaca zizzinčucča. Jalla nižtiquiztan ančucqui nii puntunacquiztan anaž iya tjaajinz pecasača, jalla. Ančucqui zizzinčuctača,

casticu zjijcni paaznaca puntuquiztanami nižaza kuz campiiz puntuquiztanami, nižaza Yoozquin kuz tjaaz puntuquiztanami, ² nižaza bautismo puntuquiztanami, nižaza kjaržtan lanz cuzturumpi puntuquiztanami, nižaza ticziquiztan jacatatz puntuquiztanami, nižaza ultim pjalz tjuñi puntuquiztanami. Jalla nižtanaca zizzinčhuctača ančhucqui. ³ Yooz munan, iya Yooz puntunaca tjaajnasača, juc'ant zuma kamañchiz cjisjapa.

⁴ Jakziltat kjanzt'ita Yooz taku catoktčhaja, jalla nuž catokzpacha Yooz quintra quejpsaja, jalla niiqui ana wilta liwriita cjesača. Jakziltat Yooz taku catoktčhaja, jalla niiqui Yooz kamañquiz luzzičanča, nižaza Espíritu Santuqui niž kuzquiz luzziča. ⁵ Nižaza ninacaqui Yooz taku zuma nayžcu catokchiča. Nižaza arajpachquiztan tjonni azi pajchiča persun kuzquiz. ⁶ Jalla nižta Yooz taku catokchi žoñinacaqui Yooz quintra quepsnaquiž niiqui, anaž wilta kuz campii atasacha zumquinaqui. Ninacz kuzqui chojrupan cjissa. Jalla nižta cjiscu, ninacapacha Jesucristo Yooz Majch wilta cruzquiz ch'awctažokazza, niž quintra žoñinacz yujcquiz cjičjiñiča. ⁷ Tii quintu nonžna. Tsjii yokaqui zkala čhjacza. Jalla nekztan chijniž tjonča. Jalla nekztan nii zkalaqui zuma čhjeriž tanča. Nižazaž pookča, nii zkala čhjacni žoñinacztajapa. Nii yokaqui Yoozqui wintijchiča. ⁸ Pero nii yokaqui ch'apinacchizkaz cjisnasaž niiqui, inakaz cjequiča. Jalla nižtiquiztan pjalžta cjequiča, ana zuma. Jalla nekztan ujquin tewjkžnaquiča. Jalla nižtaž nii Yooz taku catokžpacha quejpsni

žoñiqui.

YOOZQUIN KUZZIZPAN CJEE

⁹ Pecta jilanaca, cullaquinaca, jalla nuž chiižcumi ančuca puntuquiztan anača nižta cjiwčhiya. Ančhucqui liwriita cjiscu ultimpacha ančhucqui zuma Yooz kamañchiz kamaquiča. Jalla niiqui nužupanča. ¹⁰ Yoozqui ancha zumapanča. Ančucaquiztan anaž tjatznasača, ančucaž zuma kamchiž cjen, nižaza ančucaž Yooztan zuma munaziñi kuzziz cjissiž cjen. Ančhucqui jalla nižta kamañchiz cjen parti criichi jilanacžquiz sirwichinčhucča Yooztajapaqui. Tuquimi anzimi zakaz ančhucqui nižta zuma kamañchizza. ¹¹ Zapa mayni ančucaquiztan nižta zuma kuzzizpan cjee, juc'ant juc'ant zuma kamañchiz cjisjapa, ticzcama. Ančhucqui tirapan tjewzna, arajpachquin Yooztan zuma kamz, jalla nii. Nižaza nii oracama, juc'ant juc'ant zuma kamañchiz cjee. Jalla niil pecučha. ¹² Ančhucqui ana jayrazñi kuzziz cjee. Antiz zuma Yoozquin kuzziz žoñinacžquiz yatekasa. Nižaza pasinziz kuzziz žoñinacžquiz yatekasa. Nižta kamñi žoñinacaqui Yooz chiita zumanaca tanznaquiča, tsjii irinsažtakaz.

¹³ Yoozqui Abrahamžquiz tsjii zuma taku tjaažcu, persun ahtan juramento paachiča. Niižquiztan tsjan jilir juramento tjaaatñi ana želatča. Jalla nekztan persun ahtan juramento paachiča, ¹⁴ tuž cjican: “Ultimpacha wejrqui amquin zumanacal tjaažcača, nižaza am majchmaatinaca walja mirkatača”. ¹⁵ Abrahamqui Yoozquin kuzzizpan tjewžcu,

nii Yooziž tjaata taku tanzičha. ¹⁶ Tsjii juramento tjaañi žoñiqui nii juramento tanzñi žoñžquiztan tsjan jiliričha. Tsjii juramento paažcu, anaž iya parliz želasačha. Jalla nii puntuquiztan žeržtačha. ¹⁷ Jaziqui Yoozqui tsjii juramento paažcu taku tjaachičha. Nekztan Yoozqui nii tjaata taku tanzñi žoñinacžquiz kjanapacha tjeez pecchičha, niiž tjaata taku panž cumpliskataquičha, jalla nii. Yoozqui niiž chiita taku ana campiyasačha. ¹⁸ Yoozqui taku tjaachičha, učhumqui niižtan chica kamaquičha, jalla nii. Nekztan juramento paachičha. Jalla nii pizc taku anapan campiyasačha tsjii tsjii chiicanaqui. Yoozqui ana toscara chiyasačha. Učhumqui Yoozquin macjatchinčhumčha, niiž cuitita cjisjapa. Učhum cuitiñi Yoozza taku cumpliñiqui. Jalla nižtiquiztan Yooz taku cumpliz ora tjewžcan p'ekinchayta kuzzizpan cjesačha učhumqui. ¹⁹ Jalla nii cumpliñi Yooziž chiita taku cjuñžcupan učhum kuz tjurt'ichi cjiskatčha, ana kuz turwayskatchuca. Nii taku cumpliñi Yoozqui warcu anclažtakaz, učhum kuz tjurt'ichi cjiskatčha. Jesucristuž cjen Yoozqui niiž tjaata taku cumplaquičha. Jesucristuqui arajpachquinpacha Yooz yujcquiz luzzičha. ²⁰ Učhumž tuqui luzzičha, učhumnacaltajapa palt'izinzjapa. Jesucristuqui zuma palt'iziñi cjissičha, jaknužt Melquisedec palt'iziñi cjitčhaja, jalla nižta. Jalla nižtiquiztan učhumnacaltajapa ultimu palt'iziñi puestuquiz luzzičha.

MELQUISEDECZ PUNTU

¹ Nii Melquisedec cjita palt'iziñiqui Salem wajt jiliritača, nižaza niž puestuquiz zinta arajpach Yooziž uchtatača. Melquisedecž timpuquiz Abrahamqui quintra reynacžtan tsjii quira zalchiča, ninacž zultatunacžtanpacha. Nekztan Abrahamqui liwj atipchiča. Jalla nuž Abrahamž atipžtan Melquisedecqui Abrahamžtan zalchiča. Nekztanaqui Melquisedecqui Abrahamžtajapa Yoozquin palt'izinchiča, Abrahamžquiz Yooziž yanapta cjisjapa. ² Nekztan Abrahamqui Melquisedecžquiz tjapa niž cantiquiztan diezmo tjaachiča. Melquisedec tjuuqui tuž cjiča, Yooz kuzcama zuma mantiñi, jalla nii. Nižaza Salem tjuuqui tuž cjiča, žoñinaca walikaz žejlča, jalla nii. Melquisedecž puntu cjiča, niž mantichiž cjen, žoñinaca walikaz žejlča. ³ Yooz takuqui anaž chiiča, Melquisedecž maa ejpž puntuquiztanami, niž atchi ejpnacžquiztanami, niž majttiquiztanami, niž ticzquiztanami. Jalla nižtiquiztan palt'iziñitača Yooz Majch irata.

⁴ Jaziqui Melquisedecqui pajk jiliriča. Nii naya ančhucqui. Učhum tuquita ejp Abrahamqui quira atipžcu Melquisedecžquiz tsjii tunca parti niž cantiquiztan tjaachiča. Jalla nižtiquiztan Melquisedecqui Abrahamžquiztan juc'ant jiliriča. ⁵ Moisés lii jaru Leví cjita majchmaatquiztan tjoñi žoñinacakaz timplu jilirž puestu tanznasača, žoñinacžtajapa Yoozquin palt'izinzjapa. Jalla nii timplu jilirinacaqui parti žoñinacžquiztan ninacž želinchizquiztan diezmo cobriñitača. Aunquimi nii cobrita žoñinacaqui timplu jilirinacž

familiatača. Tjapa ninacaqui Abrahamž ejpžquiztan tjoñitača. Jalla nižtiquiztan Melquisedecqui nii timplu jilirinacžquiztan juc'ant jiliriča. ⁶ Melquisedeczi ana Leviž majchmaatquiztan tjoñitača. Pero Abrahamqui nižquiz diezmo tjaachiča. Nižaza Melquisedecqui Abrahamžquiz wintizuna tjaachiča, Yooz Abrahamžquiz taku tjaachiž cjenami. ⁷ Wintizuna tjaañi žoñiqui tsjan jiliriča wintizuna tanzñi žoñžquiztan. Anaž jakziltami nii razuna nicasača. ⁸ Tii muntuquiz kamcan žoñikazza učumnacaquiz diezmo cobriñiqui. Žoñinacača ticzñiqui. Pero Melquisedecž puntuquiztanaqui Yooz takuqui niž ticz puntuquiztan ana chiiča, wiñayjapa žejtzjapažtakazza. ⁹ Melquisedecž timpu wattan Leviž majchmaatquiztan tjonñi timplu jilirinacaqui diezmo cobriñitača. Nii cobriñi žoñinacapacha Abrahamž majchmaatquiztan tjonchiča. Jalla nižtiquiztan Abrahamž diezmo Melquisedecžquiz pactiquiztan, ninacazakaz pactažokazza. ¹⁰ Abrahamž curpuquiz niž majchmaatinaca želatča, ima majttatača. Jalla nižtiquiztan Abrahamž Melquisedecžquiz diezmo pactiquiztan, Leviž majchmaatquiztan tjoñi timplu jilirinacaqui zakaz pactažokazza.

¹¹ Leviž parti timplu jilirinacaqui Israel wa-tchiz žoñinacžquiz Moisés lii jaru kamkatchiča. Nižaza nii jilirinacaqui parti žoñinacžta Yoozquin palt'iziñitača. Nii Leviž parti žoñinacaqui Aaronž majchmaatquiztan tjonñitača. Jaziqui ninacaqui parti žoñinacžquiz Yooz yujcquiz zumapankaz cjiskattasaž niiqui, anaž iya palt'iziñi pectasača.

Nii wiruñ tjonñi palt'iziñiqui anaž Aaronž majchmaatquiztan tjonñičha. Antiz Melquisedecž partiquiztan tjonchiča. ¹² Palt'iziñi timplu jilirinacaqui campiitaž cjenaqui, lii zakaz campiitaž cjistantaćha. ¹³ Nii wiruñ tjonñi palt'iziñiqui Jesucristo Jiliriča. Jesucristuqui anača Leviž partiquiztan tjonñiqui. Antiz Judaž majchmaatquiztan tjoñitača. Pero Moisés lii jaru anaž jakziltami Judaž partiquiztan timplu jilirž puestuquiz uchtatača. ¹⁴ Timplu jilirinacž puntuquiztan Moisesqui anaž čhjulumi čhiichiča Judaž partižoñinacžquiz. Judaž partižoñinacaqui anapan timplu jilirž puestuquiz luzasača. Pero kjanapachača Jesucristuqui Judaž partiquiztan tjoñi.

¹⁵ Jalla nižtiquiztan kjanapachazakazza Moisés lii campiitaqui. Melquisedecžtakaz Jesucristučha tsjemat timplu jiliričiqui, žoñinacžtajapa Yoozquin palt'izinzjapa. ¹⁶ Moisés liiqui cjiča, ticžni timplu jilirinacaqui Leviž majchmaatquiztan tjonñižoñinacapankaz cjequiča. Jesucristuqui anaž nii lii jaru timplu jiliričjissiča. Antiz niž wiñayjapa žejtñi kamañquiztan timplu jilirž puestuquiz uchtatača, wiñayjapa žoñinacžtajapa Yoozquin palt'iziñi cjisjapa. ¹⁷ Jesucristuž puntuquiztan Yooz takuqui tuž čhiča:

“Amqui wiñayjapa timplu jiliričjequiča žoñinacžtajapa palt'iziñi. Melquisedecž partiquiztan cjequiča”.

¹⁸ Tuquita liiqui nužquiz apatatziča. Nii liiqui ana azzizza žoñinaca zumapan kamkatzjapa. Jalla nižtiquiztan ana iya walča. ¹⁹ Nii Moisés lii jaru kamtiquiztan anaž jakziltami Yooz yucquiz zumapankaz cjiskattaž atasacha. Jaziqui

tsjii ew lii žejlča; učumnacaltajapa juc'ant zumača. Nii lii jaru Jesucristuqui Yoozquin palt'iziñi puestuquiz luzziča. Jesucristuž cjen učumqui Yoozquin macjatasacha.

²⁰ Yoozqui juramentužtan Jesucristo utchiča palt'iziñi puestuquiz. ²¹ Tuqita palt'iziñi timplu jilirinacaqui ana juramentužtan nombritatača. Pero tii Jesucristo timplu jilirizti juramentužtan nombritača. Yooz takuqui tuž cjiča:

“Yooz Jiliriqi juramentužtan tuž mantichiča: Amqui wiñajapa timplu jilirim cjequiča zoñinacztajapa palt'iziñi, Melquisedec partiquiztan. Jalla nuž mantižcu, Yooz kuzquiz pinsitaqui wira ana campiyasacha”.

²² Nii Yooz chiitaž cjenaqui Jesucristuča tuqita timplu jilirinaczquiztan zoñinacztaajapa juc'ant zuma Yoozquin palt'iziñi. Jalla nižtiquiztan zoñinacaqui wiñaya liwriitapan cjequiča. Nii ew liiqui tuqita linacquiztan juc'anti zumača.

²³ Nii tuqita timplu jilirinacaqui tamatača. Ninaczquiztan anaž jakziltami wiñaya timplu jilirž puesto tanzñi atchiča. Ninacaqui tjapaž ticža. ²⁴ Pero Jesucristuzti wiñaya žetaquiča. Jalla nižtiquiztan wiñajapa timplu jiliripanž cjequiča, zoñinacztaajapa Yoozquin palt'iziñijapa.

²⁵ Jalla nižtiquiztan Jesucristuqui ultimupan wiñajapa zoñinaca liwriyasacha. Jakziltat niž cjen Yoozquin macjataquiž niiqui, wiñajapa liwriita cjequiča. Nižaza Jesucristuqui wiñaya žejtcan liwriita zoñinacztaajapa tirapan Yoozquin pjalt'izinaquiča.

²⁶ Jalla nižta palt'iziñipanž pecča učumnacaqui. Jalla nii Jesucristuqui Yooz

irata zumapankaz kamañchizza. Anaž jakziltami nižquiz tsjii uj tjojtasača. Niiqui ana zinta ujchizza. Ujchiz žoñinacžquiztan tsjematača. Arajpachquin Yooztan chica honorchizza. ²⁷ Jesucristuqui parti timplu jilirinaca ana iratača. Nii parti timplu jilirinacaqui zapuru wilanapan tjaañitača, persun ujnacquiztanami parti žoñinacž ujnacquiztanami. Jesucristuqui anapan nižta paasača, ana ujchizza niiqui. Jesucristuqui tsjii wiltapankaz wilana tjaachiča. Wilana cunta niž persun curpu intirjichiča. ²⁸ Moisés lii jaru ujchiz žoñinacaqui palt'iziñi puestuquiz uchtatača. Nii liinacquiztan wiruñ Yoozqui tsjii juramento paachiča, niž Majch palt'iziñi puestuquiz uchjapa. Nii Majchqui Yooz irata zumapankaz kamañchizza wiñajjapa.

8

EW LII ZEJLCHA

¹ Weriz chiitanacquiztan jalla tiicha chekanaqui, uchnacaltajapa tsjii zuma palt'iziñi žejlča, Jesucristupacha. Jalla niiqui arajpachquin Yooz Ejpž žew latuquiz julzi žejlča, Yooz Ejpžtan chica mantican. ² Niicha ultim Yooz kjuychiz jiliriqi, uchnacaltajapa palt'iziñjapa. Nii ultim Yooz kjuy timpluqui anaž žoñiz paatača. Nižaza anača tii muntuquiz. Antiz Yooz Jilirž arajpach kjuyapankazza. ³ Zapa timplu jiliriqi niž puestuquiz kamcan, ofrendanacami wilananacami jalla ninaca tjaañiča. Jalla nižtiquiztan Jesucristo zakaz tsjii tjaazjapa necesitča. ⁴ Jesucristuqui tii

yokquizkaz kamñi zoñi cjitasaz̄ niiqui, anaž timplu jilirimi cjitasacha. Tii yokquizpachacha Moisés lii jaru timplu jilirinaca panž žejlcha. Jalla ninacaqui tirapanž wilana tjaacha Moisés lii jaru. ⁵ Pero ninacaqui ultim Yooz kjuy timpluquiz anaž sirwiča. Arajpachquin žejlcha nii ultim Yooz kjuy timpluqui. Jalla nii timplu cunta tii yokquiz tsjii paata timplu žejlcha tsjii fotožtakaz. Tuqui timpuqui Moisesqui Yooz cjitacama tsjii zkiz timplu paakatchiča. Ima paakatcan Yoozqui niižquiz mantichiča, tuž cjican: “Sinaí curquin amquiz tjeezinča, jaknužt wejt timpluqui paaztančhalaja, jalla nii. Jalla nii jarupankaz timplu kjuya kjuystanča”. Jalla nuž mantichiča Yoozqui. ⁶ Pero Jesucristuzti zoñinacžtajapa tsjan zumaž palt'izinasacha. Jalla niiča tuquita palt'iziñinacž kamañquiztan juc'ant zuma kamañchizqui. Nižaza tuquita liiquiztan tii anzta liiqui učumnacalta tsjan zumača. Jesucristuž cjen tii anzta liiqui žejlcha. Nižaza nii liiž jaru tsjii tsjan zuma kamañaqui compromittača.

⁷ Tuquita tjaata liiqui juc'ant zuma cjitčhaj ni-iqui, anaž iya liiqui pectasacha. ⁸ Yoozqui tuquita lii jaru kamñi zoñinacžquiz ana zuma naychiča. Jalla nii puntuquiztan Yooz takuqui tuž cjiča: “Yooz Jiliriqui tuž cjiča: Wiruñta timpuquizta-
japa wejrqui tsjii ew lii tjaa-ača Israel wajtchiz zoñinacžquizimi, nižaza Judá wajtchiz zoñinacžquizimi. ⁹ Nii ew liiqui tuquita ejpnacžquiz tjaata liiquiztan tsjemataž cjequiča. Tuquiqui wejrqui ninacž tuquita ejpnaca jwessinča Egipto

yokquiztan. Nii timpuquizpacha wejt lii ninacžquiz tjaachinča; pero ninacazti wejt lii jaru ana cumplichinča. Jalla nižtiquiztan wejrqui ninaca jaytichinča. Jalla nuž cjiča Yooz Jiliriqiu. ¹⁰ Wiruñta timpuquiz Israel žoñinacžtajapa tsjii ew lii tjaa-ača, jalla tuž: Jalla nii wiruñta timpuquiz wejrqui žoñinacž kuzquiz wejt lii zizkatača, kuzquiz cjiirtažtakaz. Nekztan wejrpacha ninacž Yooz cjeeča. Nižaza ninacaqui wejt partir žoñinaca cjequiča. ¹¹ Jalla nii wiruñta timpuquiz kamñi žoñinacaqui anaž porapat tjaajnarasasača, ninacž mazinacžquizimi, nižaza ninacž jilanacžquizimi. Anaž tjaajnasacača, “Yooz Jiliržquin paja” cjan. Antiz zapa mayni Yooz Jiliripankaz pajaquiča, tsjii zkoltiquiztanpacha asta pajk žoñicama. ¹² Nižaza ninacž ujnaca pertunača, wejt okžni kuzziz cjen. Nižaza ninacž ujnacquiztan tjatznača wiñayjapa”.

Jalla nuž cjiča Yooz takuqui. ¹³ Yoozqui nii ew lii puntuquiztan chiižcu nii tuquita lii apatatchiča. Nii tuquita liiqui watchiž cjen, inakazza. Wajilla liwj tjatzaž cjequiča.

9

YOOZ ZKIZ TIMPLU

¹ Nii tuquita liiqui cuzturumpinacchizza, Yooz rispitzjapa. Nii cuzturumpinacaqui tii muntuquiz žejlñi Yooz timpluquizkaz paatatača. ² Primeraqui zkiz timplu želatča. Nii timpluquiz pizc kjuya želatča. Tsjii kjuyaqui ‘Yooztajapa

T'akžta Kjuya' cjitatača. Nii kjuyquiziqui tsjii pajk candelabra želatča, nižaza mesa želatča, Yooztajapa t'akžta t'anta nonzjapa. ³ C'uchquin tsjii kjuya želatča, 'Yooztajapa Juc'ant T'akžta Kjuya' cjitatača. Nii pizc Yooz kjuy taypiquiz tsjii pañ cortina želatča. ⁴ C'uchquin tsjii kor altara želatča, incienso ujzjapa. Nižaza tsjii caja želatča, Yooz tjaata lii chjojzjapa. Nii cajuqui kjuyltanami zawncatanami koržtan tjajlžtatača. Nii caj kjuyltan tsjii kor ojch želatča maná cjita čhjerchiz. Nižaza Aaronž wara želatča. Nii waraqui ch'ojña c'ajchiča tsjii žejtñi muntiztakaz. Nižaza nii caj kjuyltan Yooz lii cjiirtanaca želatča. ⁵ Nii caj juñtun querubines cjita želatča anjila irata paata. Nii querubinanacaqui wežlaž cherchi kjarchiztača; nii caj juntun kjarara waazitača. Nižaza nii caj juntun ljocžtan tjawkz tabla želatča, jalla niiqui ujnaca pertunta cjisjapatača. Jaziqui nii puntunacquiztan ana iya chiiz pecuča.

⁶ Jalla nuž tjacžcu timplu jilirinacaqui zawncchuc kjuyquiz luzluzñitača, lii jaru cuzturumpinaca paacan. ⁷ C'uchquin žejlñi kjuyquiz tsjii watquiz tsjii wilta luzñitača timplu chawjc jiliriqi. Nii alajakaz jalla nekziqi luzasača. Jalla nuž luzcan wilana conta ljoc chjichñitača, persun ujnaca pertunta cjisjapami, nižaza parti žoñinacž ujnaca pertunta cjisjapami. ⁸ Jalla nižta liiquiztan Espíritu Santuqi zizkatchiča, ima Moisés lii apatatzcan, nii Yooz kjuy timpluquiz paaz cuzturumpinacaqui walatča, nii. Nižaza jalla nuž walan čhjul žoñimi anapan c'uchquin luztača. ⁹ Nii tuquita

liiqui Yooz puntunaca chiiĉha tii timpuquiz kamñi ŷoñinacĉtajapa. Nii lii jaru ŷoñinacaqui ofrendanacami wilananacami tjaachiĉha. Jalla nuĉ tjaachiĉ cjenami nii ŷoñinacaqui Yooz yujcquiz ana ujchiz niĉaza zuma kuzziz ultimu ana cjiskatta cjesaĉha. Ninacaqui tirapan ujchiztaĉha. ¹⁰ Jalla nii tuquita cuzturumpinacaqui jalla tiĉtakaztaĉha: ĉhjeri tjaazmi, licz tjaazmi, kjaztan ajunzmi. Jalla niĉta cuzturumpinacaqui ŷoñĉ curpu zawnctankazza. Jalla nuĉ cjenami lii campiizcama nii cuzturumpinacaqui walatĉha.

¹¹ Wiruñ nekztan Cristuqui tjonchiĉha. Jazic niiĉha Yooz timplu chawjc jiliriĉui; Yooz zumanaca tjaazjapa tjonchiĉha. Timplu chawjc jiliri cjican Yooz kjuyquiz sirwiĉha. Anaĉ tii yokquiz paata Yooz kjuyquiz sirwiĉha. Antiz arajpachquin Yooz lijitum kjuyquin sirwiĉha. Jalla niiĉha ultim Yooz kjuya. Tii yokquiz paata Yooz kjuyquiztan juc'ant zumaĉha. ¹² Cristuqui arajpachquin ultim Yooz kjuyquiz luzziĉha. Jalla nuĉ luzcan ana cabranacĉ ljocmi niĉaza ana vac toronacĉ ljocmi ĉhjitchiĉha. Antiz persun ljocĉtan luzziĉha, ŷoñinaca wiñaya liwriita cjisjapa. Jalla nuĉ persun ljocĉtan tsjii wiltakaz luzziĉha tjapa tiĉtajapa. ¹³ Tuquita liiqui tuĉutaĉha: Cabranacĉ ljocĉtanami, vac toronacĉ ljocĉtanami ujchiz ŷoñinacĉquiz tjawkñitaĉha. Niĉaza ujta vacanacĉ kjupĉtan ujchiz ŷoñinacĉquiz llump'aczt'iñitaĉha. Jalla niĉta cuzturumpinaca zawnctankazza; ana poderchiztaĉha, ana ujchiz cjiskatzjapa. ¹⁴ Cristuĉ ljocĉti ancha juc'anti poderchizza. Nii ljocĉ cjen ŷoñinacĉ kuznacaqui zuma cjiskatasaaĉha. Wiñay ŷejtñi Espiritu Santuĉ cjen Cristuqui tsjii

zuma wilana cunta persunpacha ticziča. Ana ujchiz cjican, niž ljoc Yoozquin tjaachiča, ujchiz zoñinaca pertunta cjisjapa. Jalla nižtiquiztan Cristuqui zoñinaca liwriyasača. Cristuž cjen nii liwriita zoñinacaqui ninacž tuquita ana zuma kamañanaca jaytasača, nižaza zuma kamañchiz Yoozquin sirwasača.

¹⁵ Jalla nižtiquiztan Jesucristuž cjen Yoozqui ew lii ut'aychiča, zoñinaca ultimu liwriita cjisjapa. Zoñinacaqui primer lii mantuquiz cjican, ujnaca paañitača. Pero Jesucristuqui ticziča, nii paata ujnacquiztan liwriizjapa. Jalla nižtiquiztan jakziltat Yooz kjawžta cječhaja, jalla niiqui Yooz compromitta irinsa tanznaquiča; jalla niiqui wiñayjapa Yooztan chica kamaquiča. ¹⁶ Tsjii zoñiqui testamento paachiž cjen, niž cuzazanaca tanñi zoñinacžquiz ut'ayča. Pero ticžtankaz nii testamentuqui walča. ¹⁷ Nii testamento paañi zoñiqui tira žetan, nii testamentuqui anaž walča. Antiz ticžtan, jalla nekztanž nii testamentuž walasača. Ticžtankaz niž cuzazanaca tanñi zoñinacaqui ultimu niž cuzazanaca tanznasača. ¹⁸ Jalla nižtiquiztan tuquita liiqui ut'aytatača, conta animal ljocžtan. ¹⁹ Moisesqui tjapa Yooz mantita liinaca kjanapacha paljayžcu nii liinaca ljocžtan ut'aychiča. Moisesqui tsjii chupic choma tanžcu, hisopo cjita parquiz tjerchiča. Nekztan ljocžtan kjaztan t'ajžcu, jalla nekz nii para ch'ižcu, sucarpayñitača, zoñinacžquizimi, liichiz libruquizimi. ²⁰ Jalla nuž sucarpaycan, Moisesqui tuž cjichiča: Tii ljocqui Yooz mantita liinaca walkatča ančhucaltajapa. ²¹ Jalla nižtazakaz Moisesqui nii ljocžtan Yooz

kjuyquizimi, Yoozquin sirwiz cuzazanacquizimi sucarpayñitača. ²² Nii tuqita lii jaru jos tjapa cuzazanaca sucarpayñitača, Yooz yujcquiz zuma cjisjapa. Ljoc ana tjawkžcu ujnaca ana pertunta cjesača.

JESUCRISTUQUI ZOÑINACŽ LAYCU TICZICHA

²³ Tuqita lii jaru nii Yoozquin sirwiz cuzazanacaqui Yooz yujcquiz wali cjisjapa jalla nižta cuzturumpinaca paastantača. Tii yokquiz žejlñi cuzazanacaqui fotožtakazza. Anača arajpachquin ultimu želasača. Arajpach Yooz zuma kamañchiz cjiskatzjapa, nii animal ljocnacaqui anaž atasacha. ²⁴ Cristuqui persun ljocžtan ana žoñiž paata timpluquiz luzziča. Arajpach Yooz kjuyquizpacha luzziča. Jalla nicju anziqui niiča učumnacaltajapa Yoozquin palt'iziñiqui. Tii yokquiz žejlñi timpluqui tsjii fotožtakazza nii werar arajpach Yooz kjuyquiztan. ²⁵ Zapa wata timplu chawjc jiliriqui animalž ljocžtan Yooz kjuyquin luzñitača. Ana persun ljocžtan luzñitača. Pero Cristuqui tsjii wiltapanikaz wilana cunta cjissiča, ana wilta wilta. ²⁶ Wilta wilta wilana cunta ticztasaž niiqui, tii muntu kalltiquiztanpacha wilta wilta sufrican ticztasača. Tuqita timpu tucuzinta cjiscu tsjii wiltakaz Jesucristuqui parizquichiča. Nekztan niž ljoc tjawkžcu ticziča, tjapa ujnacquiztan žoñinaca liwriizjapa. ²⁷ Tjapa žoñinacaqui tsjii wilta ticstanča tii yokquiz. Jalla nekztan pjalžta cjequiča, Yooz yujcquiz zuma, anazuma, nii. ²⁸ Jalla nižta irata Jesucristuqui tsjii wilta tii yokquiz ticziča, wacchi ujchiz žoñinacž laycu.

Pero wiruñ wilta tii muntuquiz tjonaquiĉha. Nekztan Źoñinacž ujnacquiztan ana ticznaquiĉha. Antiz niŹquiz tjapa kuz tjewzñi Źoñinaca ultimu liwriyaquiĉha.

10

MOISES LIIQUI PJALTICHA

¹ Moisés liiqui Yooz zumanaca tsjii kolucullakaz tjeeziĉha. Ana ultimu kjana tjeeziĉha. Nii liiqui tuž cjiĉha: Wiruñ tjapa Yooz zumanaca tjonaquiĉha, jalla nii. Nižaza nii liiqui anaž ultimpacha Yooz yujcquiz zuma cjiskatasacĉha, Yoozquin macjatñi Źoñinacžquiziqui. Nii lii jaru watay wata wilanakaz contaĉha. Jalla nuž paažcumi, Źoñinacžquiz anaž ultimpacha Yooz yujcquiz zuma cjiskatta cjesacĉha. ² Nii lii jaru paacan, Źoñinacaqui ultimpacha Yooz yujcquiz zuma cjiskattasaž niiqui, anapanž wilana tira onantasaĉha. Nii wilana tjaañi Źoñinacaqui ultimu ana ujchiz cjitasaž niiqui, zumapan cjitasaĉha, nižaza persun kuzquiz ana iya cjuñtasaĉha ĉhjul ujquiztanami. ³ Pero nii wilana tjaaž liiqui watay watapanž ujnaca cjuñkatĉha. ⁴ Vac toronacž ljocmi cabranacž ljocmi tjaatiquiztanami anapanž ujnacquiztan liwriyasaĉha.

⁵ Jalla nižtiquiztan Cristuqui tii muntuquiz tjonžcu Yooz Ejpžquin tuž cjichiĉha:

“Amqui animal wilananacami ofrendanacami ultimu ana pecasaĉha. Antiz wejttajapa Źoñž curpu tjaczinĉhamĉha, Źoñinacž ujnac laycu ticzjapa. ⁶ Ujta animalanacami uj

paatiquiztan tjaata ofrendanacami ultimu am ana cuntintu cjiskatasacha. ⁷ Jalla nižtiquiztan wejrqui cjichinča: Wejt Yooz, tii muntuquiz tjonchinča, am kuzcama paazjapa. Jaknužt wejt puntuquiztan Yooz tawk liwruquiz cjijrtažlaja jalla nii cumplizjapa tjonchinča”.

⁸ Jesucristuqui cjichiča, “Yooz Ejpqui anaž pecča nižaza anaž jutztaza jalla tinaca: animal wilananacami, ofrendanacami, nižaza ujta animalanacami, nižaza uj paatiquiztan tjaata ofrendanacami. Tuquita liiqui nižtanaca tjaaz mantichiča. Jalla nuž mantita cjenami, Yoozqui anaž niikaz ultimu pecča”. ⁹ Nekztan Jesucristuqui cjichizakazza: “Yooz Tata, wejrqui tii muntuquiz tjonchinča, am kuzcama kamzjapa”. Jaziqui Jesucristuqui nii tuquita liinaca apatatskatchiča, nii lii cuzturumpinacžtanpacha. Nekztan ew lii ut'aychiča. Nii lii jaru Jesucristuqui wilana cunta intirjitatača. ¹⁰ Yooz kuzcama kamcan Jesucristuqui tsjii wiltakaz persun curpu wilana cunta intirjichiča, žoñinacž ujquiztan ticzjapa. Jalla nižtiquiztan Yoozqui učumnacaquiz zuma kamañchiz cjiskatchiča.

¹¹ Timplu jilirinacaqui zapuru ninacž puestuquiz atintichiča. Zapuru wiltan wiltan wilananaca Yoozquin tjaañitača. Pero nižta wilananacaqui ujnacquiztan anapan žoñinaca liiwriyasača. ¹² Jesucristuzti tsjii wiltakaz persun curpu wilana cunta intirjichiča, žoñinacž ujquiztan ticzjapa. Jalla nuž ticžcu, arajpachquin Yooz Ejpž zew latuquiz julziča, nižtan chica

mantiñi cjisjapa. ¹³ Jalla nicju tjewžcan žejlča, niž quintranaca liwj atiptacama cjisjapa, niž kojch koztan tjecžtažtakaz. ¹⁴ Jalla nuž žoñinacžtajapa tsjii wilta ticžcu, Jesucristuqui Yooz partiquiz žejlñi žoñinacžquiz wiñayjapa Yooz yujcquiz ancha zuma cjiskatchičha. ¹⁵ Nižaza ni puntquiztan Espiritu Santuqui chičha, tuž cjican:

¹⁶ “Tuquta lii apatatžcu, wejrqui žoñinacžquiz tsjii ew lii tjaa-ačha. Jalla nuž cjičha Yooz Jiliriqui. Wejrqui ninacž kuzquiz wejt linaca zizkatačha, nižaza intintazkatačha”.

¹⁷ Nekztan cjichizakazza:

“Ninacaž paata ujnaca ana iya cjuñznačha. Nižaza ninacaž ana wali cjičitanacami liwj tjatznačha. ¹⁸ Jalla nižta ujnacquiztan pertuntažlaj niiqui, ana iya čjul wilanami pecasačha”.

YOOZQUIN MACJATSPANZ WAQUIZICHA

¹⁹ Jilanaca, cullaquinaca, jaziqui Jesucristuž ticziž cjen učumqui ana jiwjatcan Yooz yujcquiz luzasačha. ²⁰ Ew kamañchiz kamcanaqui ana jiwjatcan Yooz yujcquiz luzasačha. Jalla ni ew kamañaqui Jesucristuž tjaatačha. Persun curpu wilana cunta tjaažcu, Jesucristuqui arajpachquinpacha Yooz yujcquiz luzzičha, ni c'uchquin žejlñi cortina cjetžtažokaz. ²¹ Jesucristučha Yooz kjuychiz žoñinacžtajapa Yoozquin palt'iziñiqui. Jaziqui učumnacaltajapa palt'izinaquičha. ²² Jalla nižtiquiztan tjapa kuztan Yoozquin macjatz waquizičha. Nižaza Jesucristužquin kuzziz cjen ana jiwjatcan

Yoozquin macjatz waquiziča. Jesucristuqui učumnacaž paata ujnaca pertunchiča, učumnac kuzquiz ana iya uj cjuñzjapa. Nižaza učum curpunacaqui tsjii zuma kjaztan awjztažokazza. ²³ Yoozquin macjatžcu Yooz famillquiz luzzinčhumča. Jaziqui ana jiwjatcan tirapan Yoozquin tjurt'ichi kuzziz cjequiča. Nekztan Yooztan chica kamaquiča. Nii Yooztan kamzqui, jalla nii Yoozqui učumnacaquiz compromitchiča. Nižaza nii compromiči Yoozza taku cumpliñiqui. ²⁴ Jalla nižtiquiztan Yooz kamañquiz kamcan porapat zumpacha p'ekinchayasa, zuma munaziñi kuzziz cjisjapa, nižaza zuma obranaca paazjapa. ²⁵ Nižaza yekjap criichi žoñinacaqui zapa domingo ana ajcajczñiča. Ana nižta irata kama. Antiz učumqui porapat zumpacha p'ekinchayasa, zuma kamzjapa. Jesucristuž tjonz tjuñi žcatžinžquiča. Jalla nižtiquiztan juc'anti učumqui porapat p'ekinchayastanča.

²⁶ Werar Yooz taku catokžcupacha nekztan kuzinpan Yooz quintra quepsnaquiž niiqui, ana pertunta cjesača. ²⁷ Pero nižta cjičjiñinaczquiz Yoozkaz casticaquiča. Yoozqui niž quintranaca wiñaya casticaquiča infiernuquin. ²⁸ Jakziltat Moisés lii ana cazzi cjitčhaja, nižaza pucultan čhjepultan testicunaca nii ana cazta puntu declartčhaja, jalla nekztan nii uj paañi žoñiqui ana okžcu conzpanikaztača. ²⁹ Jalla nižtiquiztan jakziltat Yooz Majch quintranpan quepsnačhaja, nižaza Yooz Majch liwriiñi ljoc tjawkta puntuquiztan iñarachaja, nižaza okzñi Yooz Espíritu Santužquiz žawjwa zjijcčhaja, jalla

nižta paañinacaqui juc'anti castictaž cjequiča, nii Moisés lii quintra paañi žoñinacžquiztan cjen. Jalla nižta casticzpan waquiziča nižta žoñinacžtaqui. ³⁰ Učhum pajta Yooz Jiliriqui tuž cjichiča: “Wejrtča castiquiñtqui. Wejrqui žoñinacžquiz casticača, ujnaca paatiquiztan jama”. Jalla nuž cjichiča Yooz Jiliriqui. Nižaza Yooz takuqui tuž cjiča: “Yooz Jiliriqui niž kjuychiz žoñinacž paatanaca pjalznaquiča”. ³¹ Jakziltat Yooz quintran kamchižlaja, jalla niiqui werar žejtñi Yooziž tantaž cjequiča. Jalla nuž Yooz tantaž cjequiž niiqui, nižtanacžquiz ancha ana waliž cjequiča.

³² Ančucaž Yooz famillquiz luztaž cjuñzna. Paljayta Yooz taku catokžcu, ančucqui pasinziz kuztan ancha sufrichinčucča, quintranaca ancha žejlčiž cjen. ³³ Yekjap ančucqui ch'aanitatača, nižaza wjajttatača tjapa žoñinacaž cheran. Nižaza yekjap ančuca jilanacaž nižta sufran, ančucqui “Jesalla, wejt jilača niiqui” cjican declarchinčucča.

³⁴ Ančucqui tsjii criichi žoñinaca preso tanta cjen okžni kuztan yanapchinčucča. Nižaza ančucaž cusasanaca kjañta cjenami, cuntintu kuzziz žejlchinčucča. Arajpachquin ančucaltajapa juc'ant zumanaca žejlča, wiñajapa tjurñi. Jalla nii cjuñzcu, ančucqui cuntintu kuzziz žejlchinčucča. ³⁵ Tjurt'ichi kuzziz cjican, jalla nii zuma kuzquiztan ana jayta. Ticzcama tjurt'ichi kuzziz cjequiž niiqui, Yoozquiztan pacta cjequiča juc'ant zumanacžtan. ³⁶ Ančucqui pasinziz kuzziz cjee, Yooz kuzcama zuma kamzjapa. Jalla nekztan

ančhucqui Yooziž compromitta zumanaca tanznaquiča. ³⁷ Yooz takuqui tuž cjiča:

“Wajilla nii tjonñiqui tjonaquiča, anaž ancha ažk katasacha. ³⁸ Jakziltat wejtquiz kuzziz cjen wejt yujcquiz ana ujchiz cječhaja, jalla ni-iqui arajpachquin wejttan chica zumapan kamaquiča. Pero jakziltat wejt quintra quepachaja, jalla nii žoñiča ana waliqui. Niižtan ancha anal jutzazuča”.

³⁹ Pero učumnacača anapan Yooz quintra quejpnñiqui. Jalla nuž quejpnasazaž niiqui, Yooziž ancha ana waliž castictaž cjequiča. Antiz učumča tirapan Yoozquin kuzzizqui. Jalla nuž kamcan učum persun animu zumaž čhjelinja, liwriita cjisjapa.

11

YOOZQUIN KUZUZIZ ZOÑINACA

¹ Yoozquin kuzziz cjen, učumqui ultimupan zizza, Yooz taku cumplitapanž cjequiča, jalla nii. Nižaza Yoozquin kuzziz cjen učumqui zizza, anzta timpuquiz ana cheržcumi Yooz žejlpanča, nižaza Yooz zumanaca ultimupan žejlča, nii.

² Učum tuquita atchi maa ejpnacaqui Yoozquin kuz tjaachiča. Jalla nuž Yoozquin kuzziz cjen Yoozqui ninacž puntuquiztan “Zumača ninacaqui” cjichiča.

³ Yoozqui tawkžtankaz chiican tii muntu paachiča. Yoozquin kuzziz cjen jalla nii zizza, ultim werara jalla nužupan paata, jalla nii. Yoozqui ana chertanacquiztan tii muntuquiz žejlñinaca paachiča.

4 Yoozquin kuzziz cjen Abelqui tsjii zuma ofrenda wilana Yoozquin tjaachiča. Cainžquiztan juc'ant zuma ofrenda Yoozquin tjaachiča. Abelž Yoozquin kuzziz cjen, Yoozqui Abelž tjaata ofrenda risiwchiča. Nižaza Abelž puntuquiztan Yoozqui chiichiča “Zumača niiqui” cjican. Abel ticziž cjenami učhumqui zizza, niiqui Yoozquin zuma kuzziztača, jalla nii. Jalla nii zizcuqui učhumqui Abelž zuma kamaña yatekasa.

5 Yoozquin kuzziz cjen Enocqui arajpachquin ana ticzi chjichtatača. Ana iya tii muntuquiz žejlchiča. Yoozpantača chjitchi. Yooz takuqui Enoč puntuquiztan tuž cjiča: Ima arajpachquin chjichtaž cjen, Yoozqui Enoc zuma kamañquiztan cuntintu cjissiča. Jalla nuž cjijrtača Yooz tawk liwruquiz. ⁶ Jakziltat ana Yoozquin kuzziz cječhaja, jalla nižquiztan Yoozqui anapanž cuntintu cjesača. Jakziltat Yoozquin macjatz pecčhaja, jalla niiqui criistanča, Yoozqui žejlča, jalla nii. Nižaza criistanča, Yoozqui nižquin macjatz pecni žoñinacžquiz zumanaca tjaaquiča, jalla nii. Jalla nižta criichi žoñžquiztan Yoozqui cuntintuča.

7 Nižaza Yoozquin kuzziz cjen Noequi kjaz juyzuquiztan liwriitatača. Ima kjaz juyzu tjonan Yoozqui Noežquiz chiižinchiča, “Kjaz juyzul cuchanžcača”, cjican. Jalla nii Yooz chiižintaqui Noequi catokchiča. Nekztan Yooz chiita jaru tsjii pajk warcu kjuya irata kjuychiča, niž familianacžtanpacha liwriita cjisjapa. Jalla nuž Yoozquin kuzziz cjen Noequi tjeeziča, parti žoñinacaqui ancha ujchizza, jalla nii. Nižaza

Yoozquin kuzziz cjen Noequi Yooz zuma kamaña tanchiĉha, tsjii irinsaŷtakaz.

⁸ Niŷaza Abrahamqui Yoozquin kuzziz cjen, Yooz mantita ana jayrazcu cazziĉha. Yoozqui Abrahamŷquiz cuchanzjapa kjawziĉha, yekja yokquin okajo. Niŷaza Yoozqui Abrahamŷquiz tuŷ cjichiĉha: “Wiruñ wejrqui amquiz nii yoka tjaaĉha, irinsa cunta”. Yooz mantita jaru ojkchiĉha. Jakziquin ojktĉhaja, jalla nii ana zizatĉha. Jalla nuŷ cjenami Abrahamqui Yooz tawk jaru ana jayrazcu ojkni ŷelatĉha.

⁹ Abrahamqui Yoozquin kuzziz cjen Yooz mantitacama nii Yooz tjeeŷta yokquiz kamchiĉha. Yekja ŷoñŷ yoka cjenami, Yoozqui Abrahamŷquiz nii yoka compromitchiĉha, “Wiruñ tii yoka amta cjequiĉha”, cjicanaqui. Jalla nii yokquizpacha kamcan, zkiz kjuy tultunacchiz kamniĉaĉha Abrahamqui. Jalla niŷta zakaz Isaacŷtan Jacobŷtan zkiz kjuychiz kamniĉaĉha. Nii pucultanaqui Abrahamŷ irata tjewzizakazza Yooziŷ chiita taku cumpliscama. ¹⁰ Ultimu Abrahamqui arajpach wajtquin ojkz tjewziĉha, wiñaya tjurni watja. Yoozqui nii zuma watja pinsichiĉha, niŷaza paachiĉha. Jalla nii zuma wajtquin ojkz tjewziĉha Abrahamqui.

¹¹ Niŷazakaz Sarqui Yoozquin kuzziz cjen ica cjissinĉha, chawcwa cjicanpacha. Tsjii majchchiz cjissinĉha, Yoozquin criichiŷ cjen. Sarqui tantiichinĉha, Yoozqui niŷ compromitta taku panŷ cumplisnaquiĉha, nii. ¹² Jalla niŷtiquiztan Abrahamqui ticz irarchiz cjenami tsjii majchchiz cjissiĉha. Jalla nii majchquiztan walja tama mirchiĉha, walja tama arajpach

warawaranacažtakaz nižaza walja tama kot at pjilanacažtakaz, jalla nižta mirchiča. Ancha tamaž cjen, anača kanchuca Abrahamžquiztan tjonñi majch maatinaca.

¹³ Tjapa nii žoñinacaqui, Abelžtan Enocžtan, Noežtan, Abrahamžtan, jalla ninacaqui ticziča ima Yooz compromitta taku cumplisan. Jalla nuž cjenami Yoozquin tirapan kuzziztača. Yoozquin kuzziz cjen ninacaqui zizziča, Yoozqui niž taku wiruñtajapa panž cumplaquiča. Jalla nuž kuzquiz zizcu cuntintutača. Tii muntuquiz žejlcan ninacaqui “Yekja wajtchiz žoñtča”, cjiñitača. ¹⁴ Jalla nižta chiiñinacaqui kjanapacha tjeeža, ninacaqui arajpach wajtquin ojkz pecchiča, nii. ¹⁵ Ninacaž ulanžquita yoka cjuñtasaz niiqui, nii yokquin cuttiñi attasača. ¹⁶ Ninacazti tsjan cusa yokaž pecatča, arajpach yokquin irantiz pecatča. Jalla nižtiquiztan Yoozqui anaž azkatča, ninacaž “Wejt Yoozza”, cjican cjenacqui. Yoozqui ninacžtajapa tsjii zuma watja tjacžinchiča.

¹⁷ Nižaza Abrahamqui Yoozquin kuzziz cjen tjapa Yooz mantitanacami cumpliñitača. Yoozqui Abraham yanziča, ultimu Yoozquiz kuzziz, ana ultimu Yoozquiz kuzziz, jalla nii. Jalla nuž yanzjapa Yoozqui Abrahamžquiz mantichiča, niž zinta majch wilana cunta tjaakatzjapa. Nii zinta majchqui Isaac cjitatača. Nekztan Abrahamqui niž zinta majch wilana cunta coni ojkchiča. Nekztan conzmayatača. Pero Yoozqui nii conz apatatskatchiča, Abrahamž zuma cazñi kuz zizcu. Niiž tuquiqui Yoozqui Abrahamžquiz cjichiča: ¹⁸ “Isaacž

cjen amqui majchmaatinacchiz cjequiča". Jalla nuž taku tjaachi cjenami Abrahamqui niž zinta majch wilana cunta conijochiča. ¹⁹ Abrahamqui persun kuzquiz tantiichiča, Yoozza ticzinacami jacatatskatñiqui, jalla nuž tantiyatča. Abrahamqui persun kuzquiz persun majch konz cjichipantacha. Jalla nižtiquiztan Isaac majchqui ticziquiztan jacatatchižtakaz cjišiča.

²⁰ Nižaza Isaacqui Yoozquin kuzziz cjen Jacobžtan Esaužtan, jalla ninacžquiz mazinchiča, wiruñtajapa ninacžta zumanaca cjequiča, nižaza Yooz yanapta cjequiča, jalla nii. ²¹ Nižaza ticz ora Jacobqui Yoozquin kuzziz cjen Josež maatinacžquiz mazinchiča, Yoozqui ninacžquiz zumanaca tjaaquiča, jalla nii. Nižaza Jacobqui atztan tjurt'ižcu Yoozquin rispitchiča. ²² Nižaza Josequi Yoozquin kuzziz cjen ticz ora mazinchiča, Israel žoñinacacqui Egipto yokquiztan ulnaquiča, nii. Nižaza mantichiča, persun curpu tsijnaca Egipto yokquiztan chjichajo.

²³ Nižaza Moisés maa ejpqui Yoozquin kuzziz cjen Moisés nastiquiztan chjep jiiz chjojziča. Ninacacqui cherchiča, ancha c'achja nii wawa, jalla nii. Tuquiqui Egipto chawjc jiliričiqui mantichiča, tjapa Israel lucmajch wawa contaj cjila, nii. Pero Moisés maa ejpqui Yoozquin kuzziz cjen nii chawjc jiliriz mantita ana eksiča. Moisés wawa ana conchiča. ²⁴ Nekztan Faraón chawjc jiliriz majtqui nii Moisés wawa uywassinča. Jalla nuž uywastiquiztan nii wawaqui pajkchiča. Jalla nekztan pajkžcu Moisesqui Yoozquin

kuzziz cjen Faraonž maati cunta cjis anapan pecatča. ²⁵ Antiz Moisesqui Yooz illzta Israel žoñinacžtanpacha sufriz tantiichiča, uj paañi žoñinacžtan tsjii ratukaz cuntintu žejlz cjenpacha. ²⁶ Niiž kuzquiz tantiichiča, “Egipto cusasanacžtan cuntintu kamz cjenpacha, Cristužtajapapankaz sufrasača. Jalla nuž sufrichi kamchiž cjen ultimquiziqui juc'ant cusal cjeeča, ricachu kamzquiztan”. Jalla nuž cjan, Moisesqui Yooz compromitta zumanac kjutñi pinsatča. ²⁷ Nižaza Moisesqui Yoozquin kuzziz cjen Egipto yokquiztan ulanchiča, chawjc jilirž žawjta ortina ana ekscu. Niiž kuzquiz tantiita jaru tjurt'ichi žejlchiča, niiž kuztan Yooz cherchiž cjen.

²⁸ Nižaza Moisesqui Yoozquin kuzziz cjen Yooz mantita jaru zapa kjuyquiz pascua wilana konz mantichiča. Nekztan nii wilan ljocžtan zapa kjuy zanquiz sucarpayz mantichiča Israel žoñinacž primer maatinaca ana conta cjisjapa, ticzkatñi anjilžquiz. ²⁹ Nekztan Yoozquin kuzziz cjen Israel žoñinacaqui Mar Rojo cjita pajk kota kajkchiča, kjoñ yokažtakaz. Nekztan Egipto quintra žoñinacaqui nii kjoñiranpacha nii pajk kota zakaz kakatča. Jalla nuž taypiquiz kajžcan tjapa nii Egiptonacaqui kjazquiz ticziča.

³⁰ Yoozquin kuzziz cjen Israel žoñinacaqui Jericó wajt muytata žejlñi pirkanaca pajlkatchiča, pakallak tjuñi muytata ojklayžcu. ³¹ Nižaza Yoozquin kuzziz cjen Rahabqui ana ticzinča parti Jericó wajtchiz žoñinacžquiztan. Naaqui Israel wajtchiz awayt'iñinaca zuma risiwchinča. Jalla nižtiquiztan ana ticzinča. Tuquiqui putirii

žoňtača. Nekztan Yoozquin kuz tjaachinča. Pero parti Jericó wajtchiz žoňinacaqui Yooz mantita ana cazziča, werar Yoozquin ana kuz tjaachiča.

³² Yoozquin kuzziz puntuquiztan iya quintunaca žejlča. Pero timpuž pjaltiča. Jalla nižtiquiztan ana chii atasacha Gedeónž puntu, Baracž puntu, Sansónž puntu, Jeftéz puntu, Davidž puntu, Samuelž puntu, nižaza profetanacž puntu. Jalla nii Yoozquin kuzziz žoňinacž quintunaca žejlča pero. ³³ Ninacaqui Yoozquin kuzziz cjen quintra žoňinaca atipchiča, nižaza zuma mantiňi cjissiča, nižaza Yooz compromitta taku tanziča, nižaza ana wal leonanacž atanaca chawcžinchiča. ³⁴ Nižaza ana wal uj asňinaca tjessinchiča, nižaza atipchiča, ninaca ana pajk cuchillžtan conta cjisjapa. Nižaza ana azziz žoňinacaqui azziz cjissiča Yoozquin kuzziz cjen. Nižaza quira zalcan walja azziztača, jalla nižtiquiztan quintra žoňinaca tjiranchiča. ³⁵ Yoozquin kuzziz cjen Yoozqui yekjap maatakanacžtajapa ticzinaca jacatatskatchiča.

Yoozquin kuzziz cjen yekjap žoňinacazti sufriskattača. Pero ninacaqui ana Jesucristo nicchiča, sufrisquiztan liwriita cjisjapa. Antiz tirapan tjurt'ichiča, ticz cjenami. Jalla nuž ticziča, jacatatžcu juc'ant zuma kamaňchiz cjisjapa. ³⁶ Yekjap žoňinacaqui Yoozquin kuzziz cjen iňartatača. Nižaza wjajttatača. Nižaza carinžtan maktatača. Nižaza carsilquiz chawctatača. ³⁷ Nižaza Yoozquin kuzziz cjen yekjap žoňinacaqui maztan čhajcžcu contatača.

Nižaza yekjapanacaqui taypiquiz pootžcu contatača. Yekjapanacaqui sufriskattatača, werar Yoozquiztan quejpskatajo. Pero nii criichi žoñinacaqui ana quejpsiča. Yekjapanacaqui Yoozquin kuzziz cjen cuchillžtan contača. Yekjapanacaqui Yoozquin kuzziz cjen uuzi zkizimi cabra zkizimi kujžta ojklaychiča. Ana iya zquitchiztača. Nižaza Yoozquin kuzziz cjen yekjap žoñinacaqui t'akjiri kamcan awantichiča; yekjapanacaqui ancha sufrisnaca awantichiča; yekjapanacaqui chjojritžtapan awantichiča. ³⁸ Ana criichi žoñinacaqui nii Yoozquin kuzziz žoñinacžtan ana kamz waquiziča. Ana criichi žoñinacaqui ana zumapanča. Nii Yoozquin kuzziz žoñinacasti ancha zumača. Jalla nuž cjenami tii muntuquiz sufrican awantichiča, ch'ekti yokaran ojklaycan, curunacaran ojklaycan, maz pjet ajkquiz kamcan, nižaza yok pjetquiz kamcan. ³⁹ Tjapa ninacaqui Yoozquin kuzzizpantača. Jalla nižtiquiztan Yoozqui ninacž puntuquiztan tielarchiča, “Ninacača wejtquin kuzzizqui” cjicanaqui. Jalla nuž cjenami, Yooziž compromitta taku ninacžtajapa ima cumplissiča. Yooz taku cumplitaqui ana tanziča. ⁴⁰ Učumnaca cjuñžcu, Yoozqui juc'ant zumanaca pinsichiča. Jalla nižtiquiztan ninacžtanami učumnacatanami chicapacha, nižaza tjapa Yoozquin kuzziz žoñinacaqui Yooz irata ancha zuma kamañchiz cjequiča.

12

YOOZ KAMAÑCHIZ CJEE

¹ Yoozquin kuzziz zoñinaca, jaziqui wacchi tuquita zoñinacaqui ućhumnacaquiz tjeezićha, Yoozquin kuzziz kamaña, jalla nii. Ninacaqui ućhumnaca muytatažtakazza. Ninacž zuma kamaña cjuñzla. Jalla nekztan tjapa anawalinaca paaz jaytila nižaza kuzquiz tjapa anawali pinsiskatñinaca ecla. Nekztan Yooziž tjaata kamañquiz tjurt'iñi pasinziz kuztan kamla.

² Nižaza ućhumqui Jesucristuž kamaña cjuñzla. Niiž cjen ućhumqui Yoozquin kuz tjaachinćhumćha. Nižaza niiqui ućhumnacaquiz juc'ant Yoozquin kuzziz cjiskataquićha, ancha zuma Yooz kamañchikaz cjisjapa. Jesucristuqui cruzquiz ticzcan sufrichićha. Cruzquiz ticzqui azzucataćha. Pero Jesucristuqui ana turwayzićha nii ticzjapa. Jalla nižtiquiztan arajpachquin Yooz žew latuquiz julzi žejlćha, cuntintu. Jalla nuž cuntintu žejlz zizcu, nii sufriznaca awantichićha.

³ Jesusaž kamta cjuñzna. Niiqui ujchiz zoñinacž kjarquiz ancha sufrichićha. Jalla nii Jesusaž kamta cjuñžcu Yooz kamañchiz kamcan anapan ocha, tjup kuzziz cjee. ⁴ Anćhucqui imaziž contaćha ujchiz zoñinacaž anćhucaquiz walja sufriskatanami. ⁵ Yoozqui anćhucaquiz chiižinchićha, niiž maatinacažtakaz. Jalla nii ewjt'iñi chiižinta ana tjatzna. Yooz takuqui tuž anćhucaquiz chiižinćha:

“Wejt maati, Yooz Jiliriz ewjt'iñi chiižinta ana ch-jaya. Nižaza niižquiz casticta cjenami ana llajlla kuzziz cjee. ⁶ Yooz Jiliriqui niiž k'aayi maatinaca ewjt'ićha; nižaza persun maatinaca azquichñi casticu tjaaža, wilta zuma cjcijajajo”.

7 Jalla nižtiquiztan ančhucqui pasinziz kuztan Yooz azquichñi casticu awanta. Yooz Ejpqui ančhucaquiz irpiča. Tjapa ejpnacaqui persun maatinacapanž ewjt'iča. ¿Tsji ana nižta ewjt'iñi ejp želasajo? Anaž cjesača. 8 Jaknužt Yoozqui tjapa niž maatinaca ewjt'ičhaja, jalla nižta Yoozqui ančhuc ewjt'izakazza. Ančhucqui ana ewjt'ita cjitasaž niiqui, ana lijitum Yooz maatinaca cjitasača. Ančhucqui pampan maatinacažtakaz cjitasača. Ana ultim Yooz famillchiz žoñinaca cjitasača. 9 Ančhuc cjuñzna, ocjala cjicanaqui učhum persun maa ejpqui ewjt'iñitača. Nižaza ninacžquiz rispitch-inčhumtača. Jalla nižtiquiztan žoñi paañi Yooz Epiž ewjt'itaqui juc'anti catokz waquiziča, zuma kamañchiz kamzjapa. 10 Učhum persun maa ejpqui tsji timpujapakaz učhumnacaquiz ewjt'ichiča, ninacaž tantiitacama. Yooz Ejpzi učhumnacaltajapa ewjt'iñiča, učhum tsjan zuma kamañchiz cjisjapa, niž irata ancha zuma cjisjapa. 11 Azquichñi casticunacquiztan učhumqui sufričhumča. Casticz ora llaquita kuzzizčhumča. Pero jakziltat castictiquiztan tsjan zuma kamañchiz cjissizlaja, jalla niiqui ultim cuntintu cjisnaquiča. Nižaza zuma kuzziz Yooz kuzcama kamaquiča.

YOOZQUIN TJAPA KUZ CJISPANCHA

12 Jalla nižtiquiztan ančhucqui wilta azi tanzna, zuma kamzjapa. Kjaranacami owanacami otchižtakazza. Tjup kuzziz cjee, zuma kamzjapa. 13 Yooz jiczquiz zuma ojklaya. Jalla nekztan anazuma ojklayñi žoñinaca zuma kamañquiz

irpita cjesača. Ančhucadž zuma kamtiquiztan ninacaqui zuma kamañchiz cjisnaquiča.

¹⁴ Nižaza tjapa žoñinacžtan zumapanž kamzjapa tjapa kuz tjaa. Nižaza Yooz irata ancha zuma kamañchiz kamzjapa tjapa kuz tjaa. Ana zuma kamañchiz cjequiž niiqui anaž Yooz Jiliržtan kamasacha. ¹⁵ Yoozqui ančhucquin yanapz pecča. Nii zuma yanapta ana chjaya. Yoozquiztan anapan zaraka. Ana wal jar muntižtakaz ana cjee. Jalla nuž ana wal muntižtakaz cjequiž niiqui, ančhucatami parti jilanacžtami ana wali kamañchiz cjesača. ¹⁶ Nižaza nii ana zuma kamañchiz Esaúžtakaz ana nižta cjee. Esaúqui adulteriuquiz ojklaychiča, nižaza Yooz kamaña ana importaychiča. Esaúqui jilir majch irinsižtan tsjii lujlz čhjeržtan campiichiča. ¹⁷ Nekžtan wiruñ Esauqui ejpžquiztan jilir majch irinsa tanz pecatča. Niiž ejpqui Jacobžquiz tjaachitaž cjen Esaúžquiz ana tjaas atchiča. Niiž irinsa tjaatapanča. Wiruñ Esaúqui ancha kaacanami, ana jaknužumi irinsa tanzñi atchiča.

¹⁸ Ančhucqui Yoozquin macjatžquichinčhucča. Ančhucqui anača Israel žoñinacžtakaz Sinaí curquin macjatžquichinčhucqui. Nii curquiz žoñinacaqui ojklayča, nižaza lanža. Pero Yoozquin ana lanzñi atasacha. Tuqui timpuqui Israel žoñinacadž Sinaí curquin macjatan nii curuqui ujznatča, nižaza tsokchi tsjiržtan weeztatača. Nižaza jorjorñimi lliwjlliwjñimi želatča. ¹⁹ Nekž žejlcan trompet jora nonziča. Nižaza Yooz jora nonziča, ninacžquin paljayžquiñi. Nii jora nonzñi žoñinacaqui roct'ichiča, ana iya

chiižcajo. ²⁰ Nii joraqui tuž mantichiča: “Jakziltat tii curquiz macjatžcačhaja, maztan čhaje jawi contaž cjequiča, už pajk cuchillžtan contaž cjequiča. Zoñinacami animalanacami nižta macjatžcaquiž niiqui, contaj cjila”. Jalla nuž chiižinžquitiquiztan Israel zoñinacaqui ancha tsucchiča, nižta mantanaqui ana iya awanti atchiča. Jalla nižtiquiztan roct'ichiča, ana iya chiižcajo. ²¹ Ancha ispantichucanacatača nii chertanacaqui. Jalla nižtiquiztan Moisespachača tuž cjichiqui: “Wejrqui anchal tsucuča, nižaza kjarkatuča”.

²² Pero ančhucqui Sinaí curquin ana macjatžquichinčhucča. Ančhuczti arajpach žejtñi Yoozquin macjatchinčhucča, nižžquin kuz tjaachiž cjen. Jaziqui ančhucča arajpach Jerusalén wajtchiz zoñinacaqui. Nižaza Sión cjita curquiz macjattažokazza. Nii Sión cjita curuqui cjiča, arajpach Jerusalén watja, jalla nii. Arajpach Yooz wajtquin warank waranka anjilanaca žejlča, Yoozquin rispitzjapa ajczñi. ²³ Nižaza Yooz wajtquin anjilanacžtan chica Yooz wajtchiz žejlñinacaqui ajcža, Yooz wajtchiz zoñinacžtanpacha. Jalla nii zoñinacž tjuunacaqui arajpach listiquiz cjižrtacha. Nižaza ančhucqui Yooz Jiliržquizpacha macjatchinčhucča. Nii Yoozza tjapa pjalñiqui. Nižaza ančhucatan zuma kamañchiz zoñinacž animunacžtan Yooz wajtchizza. Yoozqui ninacžquiz niž irata ancha zuma kamañchizkaz cjiskatchiča. ²⁴ Nižaza ančhucqui Jesusižquin macjatchinčhucča. Niiča ew acta ut'aychiž cjen zoñinacžta tjurt'iziñiqui. Zoñinacžtajapa ticziča. Nižaza

žoñinacž laycu niž ljocžtan sucarpaytažokaz cjichiča animal ljocžtakaz. Jesusiž ljoc tjawkchiž cjen, žoñinacaqui liwriita cjesača. Abelž ljocqui žoñinaca ana liwriyasača. Jalla nižtiquiztan Jesusiž ljocqui Abelž ljocquiztan tsjan cusača.

²⁵ Jalla nižtiquiztan ančhucqui Yooz chiita taku anaž nicaquiča, panž catokz waquiziča. Tuqui timpuqui Yoozqui Sinaí curquiztan Israel žoñinacžquiz chiichiča. Nekztan ninacaqui nii chiita taku ana juyzu paachiča. Jalla nižtiquiztan ninacaqui castictatača. Anziqui Yoozqui arajpachquiztan učumnacaquiz chiižinžquiča. Nii chiižinta ana juyzu paaquiž niiqui, panž castictaž cjequiča. Yoozquiztan anapan atipi atasacha. ²⁶ Tuqui timpuqui Yooz joraqui yokanaca chjekinskatchiča. Anziqui cjiča: “Tsjiižtan yokanacami arajpachami chjekinskatača”. ²⁷ “Tsjiižtan” cjicanaqui Yoozqui zizkatča, Yooz paata yokanacami arajpachanacami liwj kataquiča. Nekztan ana chjekinskattanaca, niikaz želaquiča. ²⁸ Yooz watjaqui ana tjatantaž cjesača, panž želaquiča. Učumča nii wajtchiz žoñinacaqui. Nižaza učumqui Yooztan chica mantaquiča. Jalla nižtiquiztan učumqui Yoozquin gracias cjizpan waquiziča. Nižaza tjapa kuztan, nižaza humilde kuztan Yoozquinž zuma rispitle, Yooz tsucchuca azi tjeezñiž cjen, nii cjuñžcu. Jalla nuž rispitan Yoozqui cuntintu cjequiča. ²⁹ Cjuñžna. Učum Yoozza tsjii anawalinaca ujzñi ujztakazqui. Jalla niča anawali žoñinaca casticñiqui.

13

CHIZINTANACA

¹ Jilanaca, cullaquinaca, porapat tirapan zuma munaziñi kuzziz cjee. ² Nižaza tjonzñi žoñinacžquiz zuma pan kjawžna. Jalla nuž kjawžcuqui yekjap žoñinacaqui anjilanacžquiz atintichiča, ana zizcu.

³ Carsilquiz chawcta jilanaca panž cjuñzna. Ančhucszakaz persun kuzquiz ninacaž chawctiquiztan sint'iz waquziča. Nižaza sufriskatta jilanacžquiz cjuñzna. Ančhucqui curpuchiz cji-canaqui zakaz sufriskatta cjesača.

⁴ Tjapa ančhucqui lucutjiñi zalžcu, zuma lilitumaž cjičjiya. Tjunatan zalžcu zuma lilitumaž kama, ana yekja maatakžtan ojklayasača. Jakziltat adulteriuquiz ojklayčhaja, jalla nižquiz Yoozqui casticaquiča.

⁵ Ančhucqui anaž paazquin kuz tjaa. Zejlñi cusasanacžtan cuntintukaz cjee. Yoozqui tuž cjičiča: “Wejrqui ančhuc anal jaytača, nižaza anal ečača”. ⁶ Jalla nižtiquiztan učumqui ana jiwjatcan chiyasača, tuž cjan:

“Yooz Jiliriča wejtquiz yanapñiqui. Zoñinacaž wejtquiz čhjulu paachi cjenami anal eksnasača”.

⁷ Ančhucqui icliz irpiñinaca cjuñzna. Ninacaqui ančhucacquiž Yooz taku paljayčiča. Jaknužt ninacaqui tjurt'ichi kuzziz ticzičhaja, jalla nii cjuñzna. Ninacaž Yoozquin kuzziz kamta jalla nižta irataž kama.

⁸ Jesucristuqui tuquitanpacha, anzimi, jaztanami tsjii kuzzizpanikazza, jalla niiča ana kuz campiiñiqui. ⁹ Nižaza ančhucqui tjapaman

tsjemata tjaajintanacžquiz anaž incallskata. Cjuñzna, Yoozqui ančhucaquiz yanapaquiča, tjup kuzziz cjisjapa. Jalla niiqui tsjan yanapča, čhjeri lujlz cuzturumpiquiztanaqui. Jakziltat nii čhjeri lujlz cuzturumpinac jaru kamčhaja, jalla ninacžtaqui anaž yanapča juc'ant zuma kamañchiz cjisjapa.

¹⁰ Učhumnacaltaqui anača animal wilana žejlča. Tsjemat wilana žejlča, Jesucristupacha. Tuquita timplu jilirinacaqui anapanča nii wilana lujlchuca. ¹¹ Tuquita lii jaruqui timplu chawjc jiliriQUI conta wilan ljoc chjitchičha c'uchquin žejlñi Yooz kjuyquin, Yoozquin ofrenda tjaazjapa, ujnaca pertunta cjisjapa. Nii wilanž curpunacaqui wajt tjii pampiquin ujñitača. ¹² Jalla nižta irata Jesusaqui wajt tjiiquin ticziča, niž persun ljoc cjen žoñinacžquiz Yooz ancha zuma kamañchiz cjiskatzjapa. ¹³ Ančhucqui ana wal kamaña eccu, Jesucristužquin macjatz waquiziča. Nekztan učhum listuž cjee, sufrizjapa. ¹⁴ Tii muntuquiz kamcan ana wiñaya tjurñi wajtchizčhumča. Pero učhumqui arajpach watjaž ojkzjapa ancha tjewža. ¹⁵ Jalla nižtiquiztan Jesucristužquin sirwican učhumqui tirapan Yoozquin honora tjaaz waquiziča. Jalla nuž honora tjaacan wilana cuntaž cjequiča. Jaziqui učhumqui persun atžtan “Yoozqui honorchizkaj cjila”, cjican chiiz waquiziča. ¹⁶ Nižaza ančhucqui zuma paaznaca panž paa. Nižaza parti jilanacžtan ančuca želinchizquiztan jama tojna. Nekztan ančucaž zuma kamtiquiztan cuntintu cjequiča Yoozqui.

¹⁷ Ančhucqui icliz irpiñinaca cazpančha, nižaza ninacž jaru cjee. Ninacaqui ančhuc cuitiñičha. Nižaza nii icliz irpiñinacaqui, jaknužt criichi žoñinaca cuitiñizlaja, jalla nii Yooz yujcquin cuenta tjaastančha. Ančhuc zuma kaman, irpiñinacaqui cuntintuž ančhuc cuitaquičha, ana llaquizcu. Ančhucqui ančhuca irpiñinacžquiz llaquiskataquiž niiqui, anapanž cusa cjesačha ančhucaltajapaqui.

¹⁸ Wejtnacaltajapa Yoozquiztan mayizina. Wejrnacqui zuma kuztanpan kamučha. Jaziqui wejtnaca kuzquiz ana zinta uj cjuñučha. Chjulu paacanami zuma lijituma kamz pecučha. ¹⁹ Nižaza wejtnacaltajapa mayizinalla, ančhucaquin wilta apura tjonzjapa, ana iya atajta cjisjapa.

²⁰⁻²¹ Yoozza žoñinacž kuznaca walikaz cjiskatñiqui. Jalla niiqui učhum Jesucristo Jiliriz ticziquiztan jacatatskatchičha. Jesucristučha učhum chawjc Awatiriqui uuzanaca itzñiztakaz. Niiqui persun ljocztan ew acta ut'aychičha wiñayjapa.

Jalla nižtiquiztan Yoozqui ančhucaquiz zuma kamañchizpankaj cjiskatla, niž kuzcama kamzjapa. Nižaza Jesucristuž cjen Yoozqui učhum yanapla, zuma obranacami paazjapa, nižaza zuma kamzjapa. Ančhucaž zuma kamtiquiztan Yoozqui cuntintu cjequičha. Jaziqui Jesucristuqui wiñayjapa honorchiz cjila. Jalla nužoj cjila. Amen.

²² Jilanaca, cullaquinaca, ančhucaquiz rocučha, weriž chiižinta taku zuma kuztan nonznaquičha. Tsjii kjaž takunaca tii cartiquiz cjijrchinčha.

²³ Učhum Timoteo jilaqui carsilquiztan

liwriitača. Jalla nii ančucaquiz maz pecuča. Timoteoqui tekz waj tjonaquiž niiqui, nižtan wejttan ančucaquin cherzñi okača.

²⁴ Tjapa icliz irpiñinacžquin tsaanžinalla. Nižaza tjapa Yoozquin criichi žoñinacžquiz tsaanžinalla. Nižaza Italiaquiztan tjoñi jilanacaqui ančucaquin tsaanžquiča.

²⁵ Yoozqui tjapa ančucaquiz zumapanj yanapt'ila. Jalla nužoj cjila. Amén.

Ew Testamento: Chipay Tawkquiztan New Testament in Chipaya (BL:cap:Chipaya)

copyright © 2009 Wycliffe Bible Translators, Inc.

Language: Chipaya

Translation by: Wycliffe Bible Translators, Inc.

Chipaya [cap], Bolivia

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chipaya

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

baeaa6d6-fcc1-578f-afbd-04a9c5c14184